
GUILLEMS DE BERGUEDAN.

2701, 7225.

GUILLEMS DE BERGUEDAN si fo un gentils bars de Cataloingna, vescoms de Berguedan, seingner de Madorna e Derriechs, bons cavalliers e bons guerrers. Et ac gran guerra con Raimon-Folc de Cardona, qu'era plus rics et plus grans qu'el. Et avenc se que un dia se trobet con Raimon-Folc et ausis lo malamen: et per la mort d'en Raimon-Folc el fo deseretatz. Longa saison lo mantenguen siei paren e siei amic; mas tuit l'abandoneren, per so que tuich los escogosset, o de las moillers, o de las fillas, o de las serrors, que anc no fos negus que lo mantengues, mas d'en Arnaut de Castelbon, qu'era un valenz hom, gentils e grans d'aquela encontrada. Bons sirventes fetz on disia mals als uns e bens als altres; e se vana de totas las domnas queill soffrian amor. Mout li vengon grans aventuras d'armas et de dompnas, e de grans desaventuras. Pois l'aucis uns peons.

7225.

CANSONETA leu e plana,
Leugereta, ses ufana,
Farai e de mo marques,
Del trachor de Mataplana,
Qu'es d'engans frazitz e ples.
A! marques, marques, marques,
D'engans etz frazitz e ples.

Marques, ben aion las peiras
A Melgurs de pres Someiras

On perdes de las dens tres :
Ni ten dan , que las primeiras
I son e noi paron ges.
A ! marques , etc.

Del bratz nous pretz una figa ,
Que cabrella par de biga
E portatz lo mal estes :
Ops i auriatz ortiga
Que'l nervi vos estendes.
A ! marques , etc.

Marques , qui à vos se fia ,
Ni à amor ni paria ,
Garder se deu totas ves
Cum que s'ane de clar dia ;
De nueg ab vos non an ges.
A ! marques , etc.

Marques , ben es fols qui s vana
Qu'ab vos tenga meliana
Meins de braias de cort ves :
Et anc fils de cristiana
Pejor costuma no mes.
A ! marques , marques , marques ,
D'engans etz frazitz e ples.

C.

Cossiros cant e plang e plor
Pel dol que m'a sazit e pres
Al cor , per la mort mon marques
En Pons lo pros de Mataplana ,
Quez era francs , larcs e cortes ,
Et ab totz bos captenemens ;
E tengutz per un dels meillors
Que fos de San Marti de Tors
Tro Cerdai' e la terra plana.

Loncs cossiniers ab greu dolor
A laissat, e nostre paes
Sez conort, que non i a ges,
En Pons lo pros de Mataplana.
Pagans l'an mort; mas dieu l'a pres
A sa part, que l sera garens
Dels grans forfagz et dels menors;
Que'ls angels li foron autors
Quar mantenc la lei cristiana.

Marques, s'ieu dia de vos solor
Ni motz vilans ni mal apres,
De tot ai mentit e mespres.
Qu'anc pos dieus bastí Mataplana
Noi ac vassal que tan valgues,
Ni que tan fos pros ni valens,
Ni tan onratz sobre'ls aussors,
Ja s'fosso ric vostr' ancessors:
E non, o dia gas per ufana.

Marques, la vostra desamor
E l'ira qu'é nos dos se mes,
Volgra ben, se à dieu plager,
Ans qu'eississetz de Mataplana,
Fos del tot patz per bona fes.
Que'l cor n'ai trist e vauc dolens
Quar no fui al vostre secors,
Que ja no m'en tengra paors
Nous valgues de la gent trufana.

En paradis é: loc meilleur,
Lai o'l bon rei de Fransa es,
Prop de Rotlan sai que l'arm'es
De vos marques de Mataplana:
E mon joglar de Ripoles
E mon Sabata eissamens
Estan ab las donnas gensors,
Sobre pali cobert de flors,
Josta'n Olivier de Lausana.